

# LEWALITABA

Leselinyana la Lekhotla la Taolo ea Motlakase le Metsi Lesotho



"SADC Member States should intensify efforts to stimulate national energy efficiency planning and to provide strong technical support across the value chain, especially in rolling out various energy efficiency programmes."

## COVER STORY:

'Moka oa matona a SADC  
holima metsi le matla o oa  
tšoaroa 4



## ALSO IN THIS ISSUE...

**3** Lekhotla le na  
le Boto e ncha

**6** Methati e lateloang  
ha ho etsoa liqeto ka  
litheko tsa motlakase,  
metsi le likhoerekhoere

**12** Litho tsa RERA  
li ba leshome le  
motso o mong



*U tšoenyehile ka*  
***Phepelo ea Motlakase?***  
*Hape le...*


- *Likhakanyo tsa khokelo ea motlakase* • *Khokelo ea motlakase*
  - *Khaolo ea phepelo ea motlakase* • *Khokelo*
  - *Khaolo ea phepelo e bakiloeng ke bothata*  
*ba marang-rang a LEC?*

*Lekhotla la Taolo ea Motlakase le Metsi (LEWA) le hlalositse litokomane tse 'maloa tseo ka tsona taolo ea motlakase e tlang ho phethahatsoa ka tsona. Ka hara tse ling, Lekhotla le hlalositse tokomane ea Lipehelo tsa Boleng ba Litšebeletso le Phepelo ea Motlakase (Electricity Quality of Service and Supply Standards - QOSSS).*

*Tokomane ena molemo oa eona ke hore K'hamphani ea Motlakase (LEC) e fane ka litšebeletso e ipapisitse le lipehelo tse behiloeng tse kahar'a eona. LEC e lebelletsoe hore ebe e qalile ho kenya lipehelo tsena tšebetsong ho tloha ka Mphalane 2002.*

*Molemong oa litšebeletso  
tse phethahetseng holim'a  
motlakase Lesotho.*





## LEWALITABA

LEKHOTLA  
LA TAOLO EA  
MOTLAKASE LE METSI

7 Floor, Moposo House, Kingsway  
Private Bag A315 • Maseru  
Maseru • Lesotho  
Tel: +266 22312479  
Fax: +266 22315094  
E-mail: [secretary@lewa.org.ls](mailto:secretary@lewa.org.ls)  
Website: [www.lewa.org.ls](http://www.lewa.org.ls)

MOOKAMELI  
Lebohang K. Moleko  
Email: [lkoleko@lewa.org.ls](mailto:lkoleko@lewa.org.ls)

MOOKAMELI OA LEFAPHA LA  
LITABA TSA SECHABA  
Shao Khatala  
Email: [skhatala@lewa.org.ls](mailto:skhatala@lewa.org.ls)

OFISIRI EA LITABA TSA SECHABA  
Sebusi Khanyela  
Email: [skhanyela@lewa.org.ls](mailto:skhanyela@lewa.org.ls)

LEWA LITABA ke leselinyana la Lekhotla la Taolo ea Motlakase le Metsi. Le hatisoa ka Senyesemane le Sesotho. Le fuoa batho bohle ba nang le thahasello litabeng tsa Lekhotla.

Maikutlo a hlahang leselinyaneng ha se a Lekhotla. Lipapatso tse hlahang ka ho lona ha se tse supang maikutlo a Lekhotla.

Litaba tse hlahang ka ho lona li ka hatisoa ntle le tefello ha feela ho ngoloa hore li tsoa ho LEWA LITABA. Re ipiletsa hore batho ba elellloe hore ho nka nakoana ho etsetsa, ho tlosa le ho etsa liphetoho lethathamong la batho ba fumanang LEWA LITABA.

Boqapi © LEWALITABA 2018

# TSE KA HARE

## MOLAETSA

ka Mookameli 2

## LEKHOTLA LE NA

le Boto e ncha 3

## 'MOKA OA MATONA A SADC

a matla le metsi o'a tšoaroa 4

## METHATI E LATELOANG HA HO ETSOA LIQETO

ka litheko tsa motlakase, metsi le likhoerekhoere 6

## BOIKARABELLO

ba Lekhotla (LEWA) 7

## METHATI EA HO FUMANA LENGOLO LA TUMELLO

ea ho fana ka litšebeliso tse laoloang ke Lekhotla 8

## BOEMO BA LITLETLEBO

selemong sa 2017-18 10

## LITHO TSA RERA

li ba leshome le motso o mong 12

## HO LEFA MOKOLOTO

ka nako ho bohlokoa 13



Dear readers,

**K**e boela ke le amohela hape leselinyaneng lena la Lekhotla la Taolo ea Motlakase le Metsi Lesotho (LEWA) la pele la Selemo sa Lichelete sa 2018/19.


Khatisong ena re bua ka lintlha tse bohlokoa haholo tabeng ea ho qala le ho ntšetsa pele puisano ea boithuto ba kamehla litabeng tsa taolo ea litšebeletso tsa motlakase, metsi le likhoerekhoere. Leselinyana lena le reretsoe ho u beha sehlohlolong sa litaba ka mosebetsi oo Lekhotla ntseng le u etsa.

## Molaetsa ka Mookameli

Litaba tse kahara leselinyana li fupere lintlha tse kang bohlokoa ba ho nka karolo hoa sechaba litabeng tse amanang le litheko tsa litšebeletso tsa metsi, likhoekhoere le motlakase, le mekhoe ea ho fumana lengolo la tumello ea ho fana ka litšebeletso tse laoloang ke Lekhotla. Re boetse re lekola boemo ba litletlebo Selemong sa 2017-18.

Hona kahar'a khatiso ena re tlaleha ka tse ling tsa litaba tse amanang le 'moka oa Matona a Mokhatlo oa Ntšetsopele ea Moruo Afrika e Boroa (SADC) a Matla le Metsi, Afrika Boroa. Ho boetse hape ho na le khotlaetso ea ho lefa mokoloto oa metsi le motlakase ka nako ka tšebeliso ea marang-rang.

Mehato ea rona ea beha ntho e 'ngoe le e 'ngoe pepeneneng le ho fana ka litaba kamehla, ho kolla ho Lipolelo tsa Lekhotla. E 'ngoe ea tsona e kolla Lepetjong la rona, ka hore re sekaneng sa moshoelella molemong oa mengoaha e tlang.

Ka hona nka leselinyana la hau 'me u ipalle. Moo u ka fumanang hore ha re fihlele litaba-tabelo tsa hau, u amohelehile hore u re fe maikutlo a hao!! U le 'mali u ka etsa kopo ea ho fumana leselinyana lena ka marang-rang ho [www.lewa.org.ls](http://www.lewa.org.ls) 

**Lebohang K. Moleko (Professor)**  
Chief Executive





## Lekhotla le na le Boto e Ncha

**L**ekhotla la Taolo ea Motlakase le Metsi Lesotho (LEWA) le thehiloe ka molao oa Lesotho Electricity Authority oa selemo sa 2002 o hlomathisitsoeng ho laola litsi tsa lefapha la motlakase, metsi le likhoerekhoere litoropong.

Ka molao matla a Lekhotla apesitsoe ke Boto ea lona. Mosebetsing oa Lekhotla, Boto e tšepetsoe ho tšoarisa lesokoana la tsamaiso le Mookameli oa LEWA hammoho le basebetsi. Mesebetsi ena e akha phano ea mangolo a tumello (lilakesense), ho etsa liqeto ka litheko tsa litšebeliso tsa motlakase, metsi le likhoerekhoere, ho beha lipehelo tsa phano le boleng ba litšebeliso le ho rarolla litletlebo tsa basebelisi ba litšebeliso.

Boto ea Lekhotla e na le boikarabello ba ho bona hore Lekhotla le phethahatsa mosebetsi oa lona eo le o filoeng ka molao. Boto e etsa liqeto tse behetsoeng boemo ba eona e le e 'ngoe. Ka tsela ena e tataisa basebetsi bohle ba Lekhotla e ntse e hlahloba liqeto le tsohle tseo basebetsi ba li entseng.

Litho tsa Boto li tšoanela ho ba teng liphuthehong tsa Lekhotla tse hlophisitsoeng ekasitana le tse kabang teng ha ho e na le tlhokahalo e joalo. Litho li tšoanela ho ba sehlohohlong ka tseo LEWA e ntseng e li etsa ekasitana le ka seo e ka se fihlelang. Leha litho tsa Boto li sa sebetse mesebetsi ea letsatsi le letsatsi ea LEWA, tebello ke hore ba tšoanela ho ananela litaba tsa tšebeliso le likhakanyo tsa lichelete, le boemo/litaba tse amang basebetsi.

Batho bao e leng litho tsa Boto ea LEWA ba na le mangolo a thuto a junifesithi mafapheng a kang la molao, khoebo le khoebisano, tšoar ea libuka, thuto ea tsa moruo, motlakase, metsi hammoho le tse ling tse ka bang bohlokoa mosebetsing oa ho laola mafapha a metsi le motlakase.

Ka Phuptjane 2018, litho tse ncha tsa Boto ea LEWA li ile tsa qala tšebetso. Tsona ke tse latelang: Monghali Relebohile Mosito (Molula-Setulo), Monghali Ntsie Maphathe, Mofumahali 'Maletsatsi Kao-Theoha, Monghali Tlali Hlasa, Monghali Tseko Molelekoa le Monghali Pashu Mochesane ▣



Litho tse ncha tsa boto ea LEWA le Professor Moleko, Mookameli oa LEWA

## 'Moka oa Matona a SADC a Matla le Metsi o'a tšoaroa

**M**oka oa Selemo le Selemo oa Matona a Matla le Metsi oa Mokhatlo oa Ntšetsopele ea Moruo Afrika e Boroa (SADC) oa bo mashome a mararo a metso e supileng (37) o ile oa tšoarelola Johannesburg, Afrika Boroa ka la 27 Phuptjane 2018.

Ketsahalo ena e ne e le karolo ea ho sala morao phethathatso ea moelelo oa 'Moka o neng o le holim'a ntlafatso ea tšebeliso-'moho lipakeng tsa *Mebuso ea SADC le Khoebo e Ikemetseng litabeng tsa metsi, matla le phumaneho/ polokeho ea lijo* (food security) tikolohong.

Ho ile ha shebisanoa ka tse ling tsa lintlha tsa bohlokoa lefapheng la matla la tikoloho ea SADC, ho behiloe leihlo holim'a maemo a phepelo ea motlakase le kanetso ea ona. Lilemong tsa 2015, 2016 le 2017 ho bile le keketseho ea tlhokahalo ea motlakase (electricity demand) ea linoko tse 6.6, 2.6 le tse 2.9 lekholong ka tatellano tikolohong. Ka kakaretso boima ba motlakase o fehloang ke litsi tsa phehlo tse tikolohong ea SADC ke 68, 234 MegaWatts (MW). Palo

ena e kenyetsetsa le motlakase oa litsi tsa lihleke-hleke tsa SADC e leng Mauritius, Madagascar le Seychelles tse fehang motlakase oa boima ba 782 MW, 246 MW le 106 MW ka tatellano.

Tabeng tsa phehlo ea motlakase ka merero e meholo ea tikoloho, ho ile hoa buisanoa ka merero oa phehlo ea motlakase o teng kahar'a naha ea Lesotho. Morero ona o tla ba Ha Ramarothole moo ho tla fehloa motlakase oa boima ba 20MW ka matla a letsatsi ke mohoebi ea ikemetseng (Independent Power Producer). Ho feta mona 'Muso oa Lesotho o ntse o lokisetse hore ho be le morero o mong oa ho fehla motlakase ka matla a letsatsi. Morero oo o tla hlahisa motlakase oa boima ba 70 MW 'me o tla phethahatsoa ka mekhahlelo e 'meli. Mokhahlelong oa pele ho tla hlahisoa 30 MW ha oa bobeli o tla hlahisa 40 MW.

Litabeng tsa metsi ho tšohliloe lintlha tsa bohlokoa lefapheng la metsi tikolohong ea SADC, ho behiloe leihlo holim'a paballo ea mehloli ea metsi le paballeho ea ona. Linaha tsa SADC li na le linoka tse kholo



"SADC Member States should intensify efforts to stimulate national energy efficiency planning and to provide strong technical support across the value chain, especially in rolling out various energy efficiency programmes."

Phutheho e ile ea bula ke Letona la tsa Matla la Afrika Boroa, Mohlomphehi, Jeff Radebe





Noka ea Senqu e bohlokoa moroung oa tikoloho e ka boroa ba Afrika ka ho e fepela metsi le phehlo ea motlakase.

tse leshome le metso e mehlano (15) tse nang le linokana le melatsoana e li tlatsang ka metsi nakong eo li phallang. Kahar'a linoka tsena ho phalla linoko tse mashome a robeli (80%) lekholong tsa metsi a hlokoang ke SADC. Ho ntso le joalo, tse ling tsa linaha tsa SADC li phela ka metsi a tsoang kantle ho meeli ea tsona. Boemong bona ho na le tlhokahalo e ntseng e phahama ea metsi ka lebaka la kholo ea sechaba, mesebetsi e meholo e kenyelletsang ea temo. Ka holim'a tsena boemo bo fetohang ba leholimo le litla-morao tsa teng li beha khatello e kholo holim'a boemo ba phephelo ea metsi kahar'a SADC.

Litabeng tsa naha ea Lesotho ho ile ha qoqoa ka ho phethahatsoa hoa Karolo ea bobeli ea Morero oa Metsi a Lihlaba tsa Lesotho le Morero oa Phephelo ea Metsi Botswana ho tsoa Lesotho (LBWTS). Morero ona oa bobeli o bohlokoa haholo kaha o hlakisa bohlokoa ba ho arolelana metsi a noka ea Senqu ke linaha tse 'maloa tseo noka eo e fetang ho tsona.

Taba ea kamano ea boteng/ phumaneho ea lijo le boteng ba mehloli ea matla le metsi e ile ea sekoa-

sekoa. 'Moka o ile oa bua ka komello le likhohola tse bang teng khafetsa tikolohong 'me oa supa hore ho bohlokoa hore SADC e rerisane le ho phethahatsa meralo e ka eketsang lijo kahar'a tikoloho ho bile ho ntso eketsoa phumaneho ea matla le metsi. Mona Ofisi ea Bongoli ba SADC e ile ea hlalosa tse seng li fihletsoe tlas'a morero oa eona o shebaneng le khokahano ea lintlha tsena tse tharo o bitsoang khokohano ea Metsi, Matla le Lijo (WEF). Merero e 'maloa e teng e tšehetsang hore WEF e atlehe. Eona e kenyelletsa litokomane tsa Regional Water Policy and Strategy, SADC Regional Strategic Action Plan on IWRM 2016-2020, Regional Agricultural Policy (RAP), Investment Plan (RAIP) le Regional Energy Access Strategic Action Plan (REASA).

Lesotho le ne le emetsoe ke Letona la tsa Matla le Bolepi le Letona la tsa Metsi e leng Mohlomphehi Mokoto Hloaele le Mohlomphehi Samonyane Ntsekele ka tatellano. 'Moka o ile oa buloa ke oa mphato oa bona e leng Letona la Matla la Afrika Boroa Mohlomphehi Jeff Radebe. Joalo le ka mehla, LEWA e ne e le teng 'mokeng ona □



## Methati e lateloang ha ho etsoa liqeto ka litheko tsa motlakase, metsi le likhoerekhoere

Lekhotla la Taolo ea Motlakase le Metsi (LEWA) le tataisoa ke molao o le thehileng oa selemo sa 2002 o hlomathisitsoeng, ho etsa liqeto holim'a likopo tsa litheko tsa metsi, likhoerekhoere le motlakase. Lekhotla le na le matla a ho beha leihlo holim'a liphelelo tsa phano ea litšebeletso tse fanoang ke litsi tse laoloang ke Lekhotla.

Ho fihlela tse boletsoeng ka holimo, Lekhotla le lokela ho ela hloko litaba-tabelo tsa sechaba, 'me sena se le tlama ho sireletsa le ho elelloa ba amehang. Ka letsohong le leng, Lekhotla le lokela ho hlokomela hore litsi tse fanang ka litšebeletso tsa metsi, likhoerekhoere le motlakase li etsa mosebetsi ka tsela e tla li lumella hore le kamoso litšebeletso li tle li fumanehe.

Phatlalatso ena e hlaha basebelisi ba litšebeletso leseling ka methati ea mantlha e lateloang ke Lekhotla hore le tle le fihlele qeto holim'a litheko. Methati ena e kenyelletsa mekhoha ea ho lekanya litjeo tse sebelisoang ke litsi le litjeo tsa kamoso le chelete e lebelletsoeng ho fumanoa ho bafani ba litšebeletso kamorao hore tšebetso e phetheloe.

Tse ling tsa lintlha tse ka sehloohong tse susumetsang hore Lekhotla le etse liqeto holim'a litheko:

- Boemo ba ho tsetela marang-rang a phano ea litšebeletso ele ho phahamisa tšebetso ea setsi se fanang ka litšebeletso;
- Ho phahamisa boleng ba litšebeletso ho bohle;
- Ho netefatsa hore litšebeletso li fumaneha ka linako tsohle;
- Ho phahamisa moruo kapa lefapha la lichelete la setsi sa phano ea litšebeletso; le
- Ho phahamisa tsotello ea tšebeliso e ntle ea metsi, likhoerekhoere le motlakase.

Ho latela molao le melaoana e tsamaisang Lekhotla, likopo tsa phetoho litheko tsa metsi, likhoerekhoere le motlakase li lokela ho ananeloa le ho hlohonolofatsoa ke Lekhotla pele li ka kena tšebetsong. Nakong eo e

bang K'hamphani ea Metsi le Likhoerekhoere (WASCO) kapa K'hamphani ea Motlakase Lesotho (LEC) li bona ho hloka hore litheko li hlahlojoe bocha, kopo e joalo e lokela ho etsoa ho Lekhotla.

Kopo ea tlathlombo bocha ea litheko tsa metsi le likhoerekhoere kapa motlakase li lokela ho tšehetsoa ka mabaka a susumelitseng kopo e joalo, le litjeo kapa litaba tsohle tse amanang le lichelete. Litaba tsena li hlahlojoe ke Lekhotla pele qeto e ka fihleloa.

Ho latela molao, kamorao ho moo Lekhotla le lokela ho nonya sechaba maikutlo holim'a kopo e entsoeng ke setsi sa phano ea litšebeletso. Kopo e joalo e ea phatlalatsoa 'me sechaba se fuoa monyetla oa ho fana ka maikutlo a ngotsoeng holim'a kopo. Nakong ea tlathlombo bocha ea litheko ka ho tsoana li moka tse kholo li ea hlophisoa 'me sechaba se fuoa hape monyetla oa ho hlalosa ka botebo maikutlo a sona holim'a kopo kapele ho Boto ea Lekhotla le setsi se entseng kopo. Maikutlo a hlahileng lipuisanong a eloa hloko ke Lekhotla nakong eo qeto e etsoang.

Lekhotla eba le tla hlahlobisa litokomane tsohle tsa kopo, mabaka a susumelitseng kopo, maikutlo a sechaba, lintlha tsohle tse amanang le moruo le litjeo tse tlang ho sebelisoa ke setsi sa phano ea litšebeletso, khonahalo ea hore sechaba se tla atleha ho reka litšebeletso ka morao ho tlathlombo, tsela eo litjeo li tlang ho ama litšebeletso ka kakaretso. Tsena tsohle, Lekhotla le li etsa le ipapisitse le melaoana e le tsamaisang litabeng tsa litheko le tsamaiso.

Ka morao ho phatlalatso ea kopo, ho utloisisa le ho hlahlobisa mabaka a susumelitseng kopo le lintlha tsohle tse hlalositsoeng kaholimo, eba Lekhotla le tla phatlalatsa sephetho sa mapomelo mabapi le litheko tsa litšebeletso tseo ho entsoeng kopo holim'a tsona. Bakeng sa tlhakisetso a batsi ka litaba tse lateloang ha ho behoa litheko, sheba litokomane tse leqepheng la marangrang a Lekhotla, [http://www.lewa.org.ls/tariffs/Tariffs\\_Determinations.php](http://www.lewa.org.ls/tariffs/Tariffs_Determinations.php) □

## Boikarabelo ba Lekhotla

**L**ekhotla la Taolo ea Motlakase le Metsi (LEWA) le thehiloe tlas'a molao oa nomoro ea leshome le metso e 'meli (12) oa selemo sa 2002 o hlomathisitsoeng. Lekhotla le laola mafapha a Motlakase ekasitana le la litšebeliso tsa Metsi le Likhoere-khoere Literopong.

Lekhotla le hlahisitse litokomane tsa Lipehelo tsa Boleng ba Litšebeliso (Quality of Service and Supply Standards) tsa motlakase, metsi le likhoere-khoere. Litokomane tsena li hlalosa boleng ba litšebeliso tse lebeletsoeng hotsoa ho bafani ba litšebeliso, eleng K'hamphani ea Motlakase Lesotho (LEC) le K'hamphani ea Metsi le Likhoere-khoere (WASCO). Sengoloa sena se hlalosa feela lipehelo tse amang phepelo ea litšebeliso tsa motlakase, metsi le likhoere-khoere.

### Lipehelo tsa boleng ba litšebeliso tsa Motlakase, Metsi le Likhoere-khoere

#### Phepelo ea Litšebeliso tsa Motlakase

(Tse lokeloang ho lateloa ka nako ea kopo le khokelo)

- Basebelisi ba litšebeliso tsa motlakase ba lokela ho fumana likhakanyo tsa phepelo ea motlakase matsatsing a leshome a tšebetso moo marang-rang a motlakase a leng teng. Ha moji a se a patetse chelete ea khakanyo, u lokela a hokeloe motlakase matsatsing a mashome a mararo a tšebetso.
- Moo e bang hona le tlhokahalo ea ho atolosa marang-rang, likhakanyo tsa phepelo ea motlakase li lokela li fumanehe nakong ea khoeli. Khokelo eona e lokela ho etsoa nakong ea khoeli tse peli.
- Boemong boo e leng hore ho hloka marang-rang a macha, ka nako e 'ngoe e kaba kopo e etsoa ke ba likhoebo tse kholo, nako ea ho fana ka likhakanyo le phepelo e ka boisanoa.

#### Phepelo ea Litšebeliso tsa Metsi

(Tse lokeloang ho lateloa ka nako ea kopo le khokelo)

- Basebelisi ba litšebeliso tsa metsi ba lokela

ho fumana likhakanyo tsa phepelo ea metsi matsatsing a tšelelseng (6) a tšebetso. Bolelele ba ho tloha moo marang-rang a fellang teng hoea ntlong bo lokela bo be lipakeng tsa lekholo le mashome a mahlano a limithara (150 meters). Moji boemong bona u lokeloa a fumane phepelo ea metsi matsatsing a leshome (10) a tšebetso.

- Boemong boo e leng hore ho hloka marang-rang/ lipeipi tse ncha, (moo e seng phepelo ea malapeng), 'me bolelele ba ho tloha moo marang-rang a fellang teng hoea moo kopo e etselitsoeng teng bo feta limithara tse lekholo le mashome a mahlano (150 meters) empa bo sa fete limithara tse sekete (1000 meters), likhakanyo li lokeloa ho etsoa matsatsing a leshome (10) a tšebetso. Phepelo eona e lokela ho etsoa matsatsing a mashome a mararo (30) a tšebetso.

#### Phepelo ea Litšebeliso tsa Likhoere-khoere

(Tse lokeloang ho lateloa ka nako ea kopo le khokelo)


- Basebelisi ba litšebeliso tsa likhoere-khoere ba lokela ho fumana likhakanyo tsa khokelo ea marang-rang a likhoere-khoere matsatsing a tšelelseng (6) a tšebetso moo marang-rang a leng teng. Bolelele ba ho tloha moo lipeipi li fellang teng hoea ntlong bo lokela bo be lipakeng tsa mashome a robong a limithara (90 meters). Moji boemong bona u lokeloa a hokeloe marang-rang a likhoere-khoere matsatsing a leshome le metso e mehlano (15) a tšebetso.
- Moo e bang marang-rang a teng, empa bolelele ho tloha moo lipeipi li felletseng teng bo feta mashome a robong a limithara (90 meters), empa bo sa fete tse makholo a mahlano (500 meters), likhakanyo li lokela ho fuoa moji matsatsing a leshome le metso e mehlano (15) a tšebetso. Khokelo eona e lokeloa ho etsoa matsatsing a mashome a mararo (30) a tšebetso. Lipehelo tsena li kenyeletsa boemo ba moo kopo e etsoang ke ba likhoebo kapa moo ho hloka marang-rang lipeipi tse ncha □

## Methati ea ho fumana lengolo la tumello ea ho fana ka litšebeletso tse laoloang ke Lekhotla

**H**o latela molao o thehileng Lekhotla la Taolo ea Motlakase le Metsi (LEWA) o hlomathisitsoeng, Khaolo ea mashome a mahlano (50) e hlalosa hore mang le mang ea ka bang le thahasello ea ho fana ka litšebeletso tse laoloang, o lokela ho etsa kopo ho Lekhotla ea ho fua lengolo la tumello (laksense).

Kopo e lokela ebe ka tsela eo Lekhotla le tla bona e nepahetse ho latela melao le melaoana e tsamaisang litaba tsena. Kopo e lokela e felehetsoe ke lipehelo tsa kopo tse behiloeng ke Lekhotla.

Lekhotla le entse tokomane e lokolisang litaba tse joalo 'me e hlalositsoe ka bokhutšoanyane ka tlaase mona.



Pele mokopi a ka fua lengolo la tumello, o lokela hore a be le boiphihlelo lintlheng tsa mantlha, Professor Moleko, Mookameli oa LEWA, o hlokomelisa bakopi.

Pele mokopi a ka fua lengolo la tumello, o lokela hore a be le boiphihlelo lintlheng tse latelang: a be le boemo bo lekaneng ba lichelete, litsebo litabeng tsa marang-rang a motlakase le litsebo tsa ho tsamaisa khoebo ea phephelo ea motlakase.

Kopo ea ho fumantšoa laksense e ka etsoa ke motho/ setsi se nang le taba-tabelo ea ho fehla motlakase (generation), ho tsamaisa motlakase ka lithapo tse kholo (transmission), ho tsamaisa motlakase ka lithapo tse kholoanyana le phephelo ea motlakase (distribution and supply), theko ea motlakase ho tsoa kantle ho naha kapa hona ho o rekisetsa ba kantle ho naha (import and export of electricity). 'Mali a elellloe hore molaoana ona ha o hlalose litaba tsa theko le thekiso ea motlakase ka hare le kantle ho naha.

Lekhotla le boetse le fane ka monyetla oa hore ho be le maemo a mang moo batho ba batlang ho kena khoepong ea tse ling tsa likarolo tse laoloang ke Lekhotla ba se qobelloe hore ba etse kopo ea ho fua lengolo la tumello ho latela maemo a fapaneng. Maemo ana e kaba (1) Moo ho fehloang motlakase o sa feteng 2 MegaWatts, (2) Moo ea tsamaisang motlakase ka lithapo tse kholoanyana (distributor) a sa feteng (50) KiloWatts ka phephelo ea malapeng, (3) Moo e bang motlakase o sebelisoa ke motho ea o fehlang 'me a o sebelisetsa moo setsing sa pehlo, le (4) Moo motlakase o fehloang o fepeloang moji ea ka hare ho jarete le setsi sa phephelo ea motlakase.

Kopo ea lengolo la tumello e lokela ho felehetsoa ke litokomane tse fapaneng, ho latela boleng ba kopo ka 'ngoe le boitsebiso ba mokopi. Boemong boo eleng hore kopo e etsoa ke K'hamphani, kopi ea libuka tsa lichelete (financial statements) hammoho le tlahelo ea Mohlahlobi oa Libuka (Auditors report) tsa selemo se holimo le tsa lilemo tse peli tse fetileng li lokela ho tsamaisoa le kopo. Litokomane tse bontšang boemo ba mokopi ba lichelete li lokela ho fanoa le tsona. Moo ebang mokopi ke K'hamphani e hlahlamang e kholo (subsidiary company), libuka tsa lilemo tse peli tse



fetileng, hammoho le tlaleho ea Mohlahlobi le boemo ba mokopi ba lichelete li lokela ho tsamaisoa le kopo. Moo teng e bang mokopi ha se K'hamphani, libuka le litokomane tsohle tse supang boemo ba lichelete le tlaleho ea Mohlahlobi oa libuka lia hloka hlahla.

Litaba le litokomane tse ling tse hlokehang haeba kopo ele ea tumello ea phehlo ea motlakase (Generation):

- Tlhaloso ea sebaka seo setsi sa phehlo se tlang ho ba ho sona;
- 'Mapa oa sebaka seo;
- Lebitso la setsi;
- Palo ea mechini ea phehlo e tlang ho sebetso;
- Tlhaloso ea hore na tšebetso ea phehlo e lebeletsoe ho qala neng;
- Tlhaloso ea hore na ka selemo e kaba motlakase o mokae o lebeletsoeng ho fehloa ka lilemo tse hlano, ntle le motlakase o sebelisoang setsing;
- Nako e lebeletsoeng hore setsi se be se ntse se sebetso;
- Bokhoni (capacity) ba mechini ka bo mong ba phehlo;
- Tlhaloso ka lithapo tse kopanyang setsi ho lithapo tsa motlakase; le
- Tlhaloso ea mokopi mabapi le hore na o tla nka mehato efeng ele ho ananela lipehelo tsa lengolo la tumello..

Litaba le litokomane tse ling tse hlokehang haeba kopo ele ea ho tsamaisa motlakase ka lithapo tse kholo (Transmission):

- Tlhaloso ea libaka moo lithapo li tlang ho feta teng;
- 'Mapa oa marang-rang;
- Lithapo tsa motlakase li lokela li tsoaue ho latela matla a motlakase a jeroeng ke lithapo tseo;
- Boitsebiso ba motho eo ho lebeletsoeng hore motlakase o tla fumaneha hotsoa ho eena lilemong tse hlano;
- Libaka kapa litsi tsohle tseo mokopi a lebeletseng ho reka motlakase hotsoa ho tsona;
- Bongata ba motlakase bo lebeletsoeng;
- Tlhaloso ka libaka moo lithapo tse kholo tse

tsamaisang motlakase li tlang ho kopana le tse ling teng;

- Khakanyo ea tlhoko ea matla le motlakase;
- Litokiso tse entsoeng ka litšebeliso tsa limithara; le
- Tlhaloso ea mokopi mabapi le hore na o tla nka mehato efeng ele ho ananela lipehelo tsa lengolo la tumello.

Litaba le litokomane tse ling tse hlokehang haeba kopo ele ea ho tsamaisa motlakase ka lithapo tse kholoanyana le Phephelo (Distribution and Supply):

- Tlhaloso ea libaka moo marang-rang a lithapo tsa motlakase a tlang ho feta teng;
- Mokhoa oo mokopi a rileng ho o sebelisa ho tsamaisa motlakase libakeng tseo le phephelo ea ona;
- Lintlha ka setsi se teng le seo ebang ke hona se tla ba teng;
- Tlhaloso ea hore na marang-rang a tsamaisang motlakase ka lithapo tse kholoanyana (distribution for supply) a hoketsoe marang-rang a tsamaisang motlakase ka liphaephe tse kholo (Transmission);
- Boitsebiso ba motho eo ho lebeletsoeng hore motlakase o tla fumaneha hotsoa ho eena lilemong tse hlano;
- Tlhaloso ka matla a jeroeng ke lithapo tse fetisang motlakase molemong oa phephelo;
- Likhakanyo tsa likhokelo tse tlang ho etsoa;
- Matla a motlakase a lebeletsoeng hotsoa ho setsi sa phehlo lilemong tse hlano tse latellanang;
- Khakanyo ea tlhoko ea motlakase ea selemo le selemo lilemong tse hlano; le
- Khakanyo ea motlakase le matla tse tlang ho rekisoa selemo le selemo lilemong tse hlano.

Litaba tsena tsa kopo li ka fumaneha liofising tsa Lekhotla, Moposo House, Mokatong oa bosupa le marang-rang a lona ([www.lewa.org.ls](http://www.lewa.org.ls)). Litokomane tsa molao tse tšhelitseng litaba tsena ke Lesotho Electricity Authority Act 2002 e hlomathisitsoeng le Lesotho Electricity Authority (Application for Licence) Rules, 2012 

## Boemo ba litletlebo selemong sa 2017-18

**N**ako le nako Lekhotla la Taolo ea Motlakase le Metsi (LEWA) le lula le thakhola leseli la sechaba le amanang le boithuto bakeng sa basebelisi ba Toropong ba Litšebeletso tsa Metsi le Likhoerekhoere (UWSS) hammoho le basebelisi ba Lefapha la Motlakase (ESI) ka litokelo le methati eo ba ka e latelang ha ba sa khotsofalla bosebeletsi ba lik'hamphani tse taolong ea LEWA.

Selemong sa Lichelete sa 2017-18, Lekhotla le ile la sebetsana le litletlebo tse leshome le metso e supileng ho tsoa Lefapheng la Motlakase le la Litšebeletso tsa Metsi le Likhoerekhoere. Joalokaha ho ile hoa hlaloso, sena se hlalosa hore litletlebo tseo Lekhotla le li amohetseng selemong sa lichelete sa litlaleho li nyolohile ka robeli 'me sena se hlakisa kholo ea mashome a mane a metso e supileng lekholong. Bongata ba litletlebo tse amohetsoeng Selemong sa 2017-18 bo pakahatsa kholo le katleho ea ho tsebahatsa leseli la tsebo/boithuto bo etsoang ke Lekhotla ka thuto ea litokelo tsa baji.

Lekhotla le nka litletlebo li le bohlokoa kaha li fana ka leseli le etsang hore le kale/nonye tšebetso ea lona le ho matlafatsa lik'hamphani tse boliseng ba lona ekasitana le ho fumana lintho tseo Lekhotla le neng le sa li tsebe hore li ea etsahala e le hore li matlafatsoe bakeng la kamoso. Ka lehlakoreng le leng, litletlebo li thusa hore lik'hamphani tse boliseng ba Lekhotla li fane ka tšebeletso e tsoileng matsoho e buoang puo ea Boleng ba Phano ea Litšebeletso (QoSSS) e fanoeng ke Molao oa selemo sa likete tse peli le peli (2002) o hlomathisitsoeng. Hape, litletlebo li boela hape li thusa LEWA hore e utloisise litlhoko tsa basebelisi ba litšebeletso ka tsela e bobebe.

Ka hara ESI, litletlebo tse tšeletseng li ile tsa amoheloa e le tsa Selemo sa 2016/17 ha tse 'ne (4) tsona li amohetsoe nakong ea selemo sa tlaleho (year under review). Sena se bolela hore bakeng sa nako ea tlaleho, Lekhotla le sebetsane le litletlebo tse leshome ka kakaretso. Ho tsena tse leshome (10), tse hlano (5) li ile tsa sebetsoa ka katleho, ha tse hlano (5) li sa ka tsa



Tse ling tsa litletlebo tseo LEWA e li fumanang li holima litšebeletso tsa motlakase.





Ho ahoa hoa Letamo la Metolong ho fokolitse litletlebo tse neng li le holima litšebeletso tsa metsi.



qeteloa. 'Me ha ra tsona ha ho litletlebo tse ileng tsa isoa kapela Boto bakeng la qaka tse boima. Boholo ba litletlebo e ne e le tsa tsekisano e holima thepa ea litšebeletso (wayleave) ka linoko tse mashome a supileng lekholong (70%), ha linoko tse leshome lekholong (10%) tsona li ne li le holimá puseletso ea chelete khokelong ea marang-rang (freeriding) hammoho le mashome a mabeli a linoko lekholong (20%) e ne e le holimá setlankana sa patala/mokoloto (biling). Kahara lefapha la UWSS teng, litletlebo tse tharo li ile tsa amoheloa e le tsa Selema sa 2016/17, ha tse 'ne (4) tsona li amohetsoe nakong ea tlaleho ea 2017/18. Ka 2017/18, litletlebo tse tšeletseng li ile tsa rarolloa, ha e le ngoe eona e setse e sa rarolloa. Tlhaloso ea litletlebo tsena e bontša hore linoko tse mashome a mane lekholong (40%) e ne e le tse holimá setlankana sa patala/mokoloto, mashome a mabeli a metso e robong (29%) eona e ne e le tse holimá khokelo ea litšebeletso ha mashome a mabeli a metso e robong (29%) e ne e le tse holimá litsekisano tsa tšebeliso ea litšebeletso. Lekhotla le ile la e ba le litletlebo tse hlano (5) tse ileng tsa luleloa faatše lipakeng tsa baji le K'hamphani ea Lesotho ea Motlakase (LEC) 'me

kaofela ha tsona liile tsa rarolloa/sebetsoa ka katleho.

E le khopotso ho tsoa lingoliloeng tse fitileng, Lekhotla le sebetsana le litletlebo tse sa rarolloang ke likhamphani tse bolaoling ba eona nakong ea matsatsi a leshome (10) a tšebetso. Khothaletso ke hore basebelisi ba litšebeletso ba etse tletlebo ea bona ka mongolo hape ba be ba ipolokele kopi ea lengolo leo la tletlebo e le hore e tle e be bopaki ba hore e fela ba ile ba etsa tletlebo. Basebelisi ba litšebeletso ba hopole hore Lekhotla le sebetsana feela le li tletlebo tse amanang le phano ea litšebeletso, polokeho ntle le tletlebo tsa puseletso. Methati ea ho sebetsana le litletlebo tsa puseletso e ntse e sebetsoa.

Lekhotla le lumela hore tšebeletso e tsoileng matsoho ke tšiea ea bohlokoa nakong ena ea mahlale a ntšetso-pele, 'me ke ka lebaka lena le sebetsang litletlebo ka mokhoa o potlakileng, le bile le le hlokolosi. Kaha le hlokomela boemo ba phethoho ba bosebeletsi ba bareki moo teng tsoaro e ntle e leng bohlokoa haholo. Mosebelisi a le mong ea sa khotsofalang ke ntho e sa amoheleheng ho Lekhotla ■



## Litho tsa RERA li ba leshome le motso o mong

**B**oemo ba taolo ea litšebeletso bo ntse bo eketseha linaheng tse bopileng Mokhatlo oa Ntšetsopele ea Moruo Afrika e Boroa (SADC) kaha bohola li se li ena le Makhotla a Taolo ea matla kapa motlakase.

Ka Phuptjane 2018 e ne se ele linaha tse leshome le metso e mene (14) tsa SADC tse kentseng tšebetsong maano a hore ho be le makhotla a laolang litšebeletso tsa matla (energy regulators). Naha e saletseng morao ke ea Democratic Republic of Congo (DRC) e seng e le mathuleng a ho fetisa molao o thehang lekhotla la taolo la naha eo.

Sena se bolela hore litho tsa 'Mamekhatlo oa Makhotla a Taolo ea Motlakase Afrika e Boroa (Regional Electricity Regulators Association li nyolohetse ho leshome le motso o mong) kamor'a hore Botswana Energy Regulatory Authority e be setho.

RERA e ntse e hlophisetsa hore e bope litokomane

tsa boemo bo holimo le mekhoe ea tsamaiso ea mosebetsi oa taolo tse tla sebelisoa ho tataisa bohle ba nang le kobo-ea-bohali litabeng tsa khoebo le khoebisano ea matla haholo-holo motlakase hore na ba ea li latela. Ho feta mona litho tsa RERA li lokela ho ithukhubetsa ka matla ho atlehisa meralo ea tsona, lintlheng tse kang boithutong ba maano a ntlafatso, ho bapisa tšebetso le koetliso ka kakaretso har'a bona.

Tsela ena e nkiloeng ke makhotla a taolo ke ho fetoha ho tloha ho taolo ea motlakase ho isa ho ea matla (from electricity to energy regulation). Kahar'a litho tse leshome le motso o mong tsa RERA tse robeli li se li laola matla kaha'ra linaha tsa habo tsona, 'me tse tharo hammoho le LEWA ke tsona feela tse ntseng li laola motlakase. Ka Tšitoe ngoahola K'hansela ea Motlakase ea Naha (CNELEC) ea Mozambique e ile ea fetoleloa ho Lekhotla la Taolo ea Matla (ARENE). Mosebetsi oa ho fetola Boto ea Taolo ea Motlakase (ECB) ea Namibia ho Lekhotla la Matla Namibia (NERA) o se o hatetse pele ■

Metsi ke bophelo!

Ha hole joalo, WASCO e ka se khaole litšebeletso nakong ea matsatsi a phomolo, Labohlano kapa mafelong a beke.



## Ho lefa mokoloto ka nako ho bohlokoa

**M**elemo ea tšebeliso ea marang-rang a sejoale joale ha ea akofisa tšebetso ea lefapha la khoebo feela empa le boetse le fane ka melemo e sehlopha ho bareki.

K'hamphani ea Metsi le Likhoerekhoere (WASCO) hammoho le K'hamphani ea Lesotho ea Motlakase (LEC) ha li ea itheka moralo le tsona, 'me li thakhotse mekhoe e bobebe ea lihlahisoa tsa "M-PESA le ECOCASH" hore bareki ba patale kapele ntle le ho ema meleng e melelele le ke ho tsoarelloa ke liqholotso tse kang phallo e holimo ea sephethe-phethe.

Joalokaha Lekhotla la Taolo ea Motlakase le Metsi (LEWA) le laetse WASCO hore e fumane mekhoe e bobebe ea ho lata mekoloto ea litšebeletso e le karolo e 'ngoe ea ho ikamahanya le meoloane ea tsamaiso le hona ho bontša bokhoni ba eona ba tsamaiso ea lichelete, tšebeliso ea sejoale-joale ea marang-rang e tlisitse bobebe bo boholo ho baji. Tsena ha se feela litlabocha tsa marang-rang empa ke ntšetso-pele ea sechaba. Lihlahisoa tsena li sebeliseha ha bobebe bakeng sa ho lefa mekoloto ea litšebeletso 'me li boetse li thusa hore bareki ba se khaoleloe litšebeletso tsa metsi kapa motlakase ekasitana le ho qoba phaello ea chelete e bakoang ke mokoloto o fitileng (arrears). Lihlahisoa tsena li etsa hore basebelisi ba iketle.

Kantle ho moo, lihlahisoa tsena li thusa batho ba

lulang hole le toropo ho lefella litšebeletso tsa metsi le motlakase kantle le ho ngongorehisoa ke bolelele ba libaka tseo ba phelang ho tsona le maemo a leholimo. Ruri re phaphatha WASCO le LEC mahetla ka tšebeliso ea litlabocha tsena tsa mongoaha oa bone (industrial 4.0) sa mahlale le tšebeliso ea oona. Industrial 4.0 ke lihlahisoa tsa marang-rang le tšebeliso ea oona tse etsang hore bophelo ba batho ka kakaretso bo bebofale, 'me bo ntlafale e le hore baji ba nolofalloe ke bophelo le tšebeliso ea marang-rang.

Basebelisi ba litšebeletso ba lokela ho hopola hore ho ea ka lipehelo tsa Lekhotla tse amanang le Tokomane ea Phano le Boleng ba Phano ea Litšebeletso (QoSSS), WASCO le LEC li na le matla a ho khaola litšebeletso ha mosebelisi oa litšebeletso a sa lefa mokoloto oa hae leha mosebelisi/moji a entse khokelo e seng molaong. E le ho qoba ho khaholeloa litšebeletso, basebelisi ba lokela ho lefa mekoloto ea litšebeletso ka nako, le hona ho qoba phaello ea chelete e bakoang ke mokoloto o fitileng. Basebelisi ba litšebeletso ba eletsoa hore ba nke ho patala mekoloto ea metsi le motlakase e le lintlha tsa mantlha kaha litekanyetso (budget) tsa bona tsa khoeli le khoeli. Ka ntle ho tšebeliso ea marang-rang ho lefa mekoloto ea litšebeletso, basebelisi ba litšebeletso ba ka boela ba lefa k'hauntareng liofising tsa WASCO le LEC, ka mokhoa oa tefo o hokangoang ke banka khoeli le khoeli (stop order) kapa mabenkeleng a nang le kabelo □






U na le thahasello  
ea ho tseba  
haholo ka  
Lekhotla la Taolo  
ea Metsi le  
Motlakase?

Visit our website:  
[www.lea.org.ls](http://www.lea.org.ls)

Ho fumana tlhakisetso e felletseng, ikopanye le rona:

Tel: +266 22 312479 Fax: +266 22 315094

Email: [secretary@lewa.org.ls](mailto:secretary@lewa.org.ls)



Bala leselinyana la LEWA!



Motlakase o **kotsi**  
ha o sebelisoa  
hampe!

Ke 'nete hore **motlakase** o bohlokoa haholo maphelong a rona ka kakaretso. Ho tloha nakong eo re tsohang, ho fihlela ha re robala, re sebelisa motlakase. Ka lebaka lena, ke ntho e sa makatseng hore re o sebelisa ntle le ho se nahane mathata a ka bakoang ke ho o sebelisa hampe, 'me oa hlahisa batho **kotsi** kapa hona ho ba bolaea.



Lekhotla la Taolo ea Motlakase le Metsi Lesotho  
le na le bokirabello ba ho hlokomelisa sechaba ka tšebelei so e mope ea motlakase e ka bakang likotsi.